

UN JARDIN PÈR PANTAIA

La nèu d'amelié mando si fuioun à la ventoulado dins qu'un giscle de flour cando. L'aubriho encaro ennegrado de l'ivèr es à l'espèro de si ba revihadis, frenissènto. Li parpaiolo lóugiero se pauson sus li bout d'erbo e li flourisson miés que de margarideto proumierenco.

Darrié la vitro que lou soulèu escandiho, uno amo viho. Uno pousso d'or retrais l'oumbrino de la fenestrello sus la taulo de nouguié rounsous. De belugueto vivo valson e remoulinejon dins lou rai melicous aluminant lou silènci de l'oustalet.

La boussello es au caud dins la terro trisso, de migoun endrudido. Despièi quant de tèms ?

Se reviho, que la raisso nouveleto a pica à soun entour. La raisso? Nàni. N'es que lou rajòu d'un arrousadou à travès sa poumello. Just un cascai lóugié coume lou risoulet d'un enfantoun. E, aro, de lóngui fueio palinello, plantado drecho, grèion à cha uno, entandóumens qu'uno tijo redo coume un aste crèis de dous det cade jour. De que diàussi se bressolo à soun bèu bout? Un bourroun refrounsi, escoumesso d'uno flour estraourdinàri.

La flour de fiò es espelido. Sa courolo de velout pourpra dóu cor endre se desplego à l'Ouriènt. Cade jour un cournet nouvèu espeto sa flambour.

Un Amariéli que ié dison. Mai, dins soun interiour secrèt, la Mameto l'a noumado sa flour d'amour.

Fau vous dire que, dins aqueste jardinet, chascun faguè la chausido de soun aubre lou jour de soun seten anniversàri qu'avès l'age de sagesse. A la fin de l'estiéu, Miu e Mia mi aduguèron soulenne pèr recounèisse soun ami. Lou drole diguè :

« Iéu, lou ciprès sara moun coumpagnoun, es dre, es soulide, es fièr, escalo fin qu'au cèu, pourrai tuteja li niéulo. »

Mia furnè di quatre bord e fin finalo se plantè davans un aubre gracios emé si bouquet de fueio tendrinello. Ja pourtavo de gréu bourrihous.

- *Veses, Mia, alestis soun espelisoun pèr l'an que vèn. Ié dison un magnoulié.*

- *Sara lou miéu, la pichouneto ié venguè, qu'aqueste noum estrange enchusclè.*

- *Lou regretaras pas.*

Aquesto primo, l'aubre subre-bèu, duerb si flour necrado au trelus. Dirias de man jouncho dins qu'uno preguiero de sedo roso. Si fuioun se desfrounsisson dins un parfum enebriant que lis abiho carrejon d'un coupo d'amour l'autro. Mia s'enausso sus la pouncho di pèd e carranchouno li meraviho. Santo comunioun de l'innoucènci emé la naturo.